

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个僵攞手；難得个放棄日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔奈；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田滄出來哩；風吹來，該一陣一陣歡喜到手攘腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嬾下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過時二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項搵手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆跔在屋面前个菜園摘菜，菜園分屋仔蔭等、日頭還吉會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿俵仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醜，靚靚个日頭、靚靚个心情，這就係簡單个幸福。

¹ 手攘腳踏：音 su` ngiong` giog` tab；手、腳舞動跳躍。形容非常高興喜悅的樣子。

112 年全國語文競賽客家語朗讀文章高中學生組（四縣腔）

編號 2 號

【陂塘】許倩雯原作

用鏡頭記錄臺灣這片土地个導演齊柏林，坐在直升機頂對天頂看往下，佢講桃園个陂塘就像係「散落一地个水晶，金哲哲仔¹！」

兩隻白鶴仔一前一後在陂塘面飛過，白雪雪个身影印在平靜个水面。嫩黃个水蓮花²對青青个水肚探出水面，細細蕊仔个花就像係天頂一瞞一瞞个星仔，靚到耐毋得。

立秋正過啊忒，陂塘就飛來咧一群準備愛過冬个人客！鬥腳鳥³水紅色个長腳，躡在淺水所在定定仔行，鳥觜在水肚掃來掃去掃毋會停，煞力拈在該尋食。花喇花喇⁴个細水鴨頭那汨入水肚，屎脰翹到半天高。忽然間，一粒扁扁个石頭飛啊過來，嚇到這群鳥仔披翼飛走。原來係陂塘脣，一陣細孺仔在該打水漂仔。坐在樹下擎等釣槓个男仔人，大聲罵：「人家在這釣魚仔，你兜孤盲頭在該變麼个齣事，莫來這搞！」

月華蹶上天頂，在水膠地个合界，白鶴花⁵个清香跔等夜風散開來。夜呱仔⁶醒吔，昏哆昏哆⁷个喊等：「嘎！嘎！嘎！」；像烏鈕仔恁大个蜈蚣仔拂等尾泗水，正對厥圓身生出來个四支腳，在陂塘脣尋等所在上岸。蛇哥發現正在水肚跳出來个烏影，黏時就對草竇趁啊出來，開始逐佢兜！

有人同桃園喊做「千塘之鄉」，這肚底像碗公樣仔，大大細細个陂塘，全部係人工挖出來个。先民在開墾个過程肚盡辛苦，高不將挖陂塘來頓水蔭田。陂塘盡多个時節，有萬過隻，也變成桃園盡特殊个地理景色。每一隻陂塘都有自家个故事，當多人第一擺个泗水、第一擺个釣魚仔，都係在陂塘發生个。

年視年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，無就公園。伸著个陂塘，經過規畫整理，有咧新生命个延續，變做現代人休閒遶寮个好所在！

¹ 金哲哲仔：音 gim' xiaŋ' xiaŋ' e'；金光閃閃。

² 水蓮花：音 sui' lien' fa'；臺灣萍蓬草。

³ 鬥腳鳥：音 deu' giog' diau'；高蹺鴿。

⁴ 花喇花喇：音 fa' la' fa' la'；花色混雜。

⁵ 白鶴花：音 pag' hog' fa'；野薑花。

⁶ 夜呱仔：音 ia' gua' e'；夜鷺。

⁷ 昏哆昏哆：音 fun' de' fun' de'；糊塗、精神意識不清楚的意思。

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該載堵好係梅雨季節，落過雨、起風吔，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩天弓，還鼻得著打馬膠路¹分日頭花煎過、分雨水打過以後淡淡、香香个味緒，臨暗頭窗門外背一陣一陣「揸、揸、揸！揸、揸、揸！」个蟬仔聲順等清風傳入屋肚來。

恁起還細時節，熱爌爌个下晝頭，恁恁多姊妹會摻隔壁鄰舍个細人伴仔共下搞，輒常搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，故所總係暗晡頭八、九點正下班。當記得係堵好該日無伸麼个飯菜，吾爸會自家煮麵食。逐擺佢就摻蒜頭礮礮啊、再剁到幼幼，泔一息仔豆油還過香油，先放在碗公肚，續等摻煮好个麵撈起來，水泌昇燥，再同麵倒到碗公，摻麵同蒜頭、配頭攪昇勻，該央時係聽著吾爸問：「有麼

人愛食麵無？」佢這兜就盡暢，遽遽飄入灶下，你一口、佢一口，又賺著一餐香噴噴个大麵點心，食到飽餬餬仔，還幸福哪！吾爸同伸个飯菜間等伸無幾多條个大麵，儘採划落肚，就恁樣過一餐。

又還記得，熱天臨暗頭洗好身腳，等到食飽夜，碗筷撿掣，寫好作業，看一下電視，細人仔還細又好搞，差毋多到愛上眠床該下，又一身汗吔；毋過，頭擺屋下無恁好額，淨有一隻間房安有冷氣定定。阿姆會提早半點鐘摻冷氣拘開來，等大家愛睡目該下，間房門打啊開來，涼沁沁个冷氣，還有阿姆拿去晟過日頭个被骨，散出香香个日烈味緒，歸屋下人尖在兩頂眠床項，黏時就睡落覺咧。

這幸福个滋味一直囿在吾心肝頭，毋多知仔成人長大、做人阿姆以後，正知「賺錢可比針挑笏，使錢可比水推沙。」正體會著爺哀頭擺辛苦畜大佢這兜恁多个細人仔、愛理一個家哪有恁該？毋過該愛盡个責任摻義務，佢兜從來都毋識放忒過。

¹ 打馬膠路：音 da` ma` gau` lu；柏油路。

【頭回蹶大山】范振新原作

「避暑來去蹶百岳，愛無？」就因為這句話，佢俚三兄弟就跔等滿叔，共下去蹶人生个第一座大山。該央時，佢還毋知蹶恁樣个高山有麼个特別，也毋了解蹶三千米以上个山仔愛知得哪兜孔竅，佢這從細戴山肚个半桶水還話著膠頭擺蹶个五指山、石門山這兜淺山仔爭七毋爭八¹，無頭無腦就想跔等去，正經係細和尚仔唸金剛經——毋知頭又毋知尾。

記得該擺蹶个係池有山膠品田山，滿叔安排兩日兩夜。頭暗晡佢兜先歇在武陵農場，第二日打早六點就出發，按算斷烏前行到新達營地。頭下碼正開始蹶該下，佢恅著自家个體力當好，平常時也有運動个習慣，故所行盡遠，想愛早一息仔蹶上山頭。無胚著，正行點零鐘仔就佇毋著也，歸身仔汗流脈落，強強會啟氣毋出。

佢試著盡奇怪，這擺愛蹶山以前，佢還釘工逐日去運動坪練習，仰會還係恁瘥？背尾正知，係因為山頂个氧氣較少，又愛背食糧、滾水、襖婆這兜加加起來完十公斤个東西，身體需要還較

多个能量，正會行一細截仔就啟大氣。該載，老弟也同佢共樣，佢緊啟大氣緊問滿叔：「會到吉？還有幾遠？」滿叔笑笑仔應講：「還吉得時哦，登山口就還吉到咧！加油！」聽著滿叔恁樣講，佢正經愛嗽無目汁，高不將膠自家个包袱仔擱起來刻耐仔續等行往上。滿叔又講：「毋好行恁遠，山又毋會走忒，定定仔行就好，瘥咧就頓恬下來歇睏，山頂个光景當靚哦！」

斷真，山頂个路彎彎幹幹，毋過見轉一隻彎就有新个天地，在山肚滿哪仔都係好風光，尤其係對面个群山，在半山排遠遠看啊去，一片青里里仔，再加上青天膠白雲不時个變化，每一分鐘、每一秒都像係無共樣个風景明信片。歸路仔還有鳥仔、蟲仔在該唧唧唧唧，佢就在這大自然个音樂會裡肚，一片享受山頂个美景，一片手爬腳蹶繼續行。三不二時還做得看著鷓婆在天頂飛來飛去，感覺當自在、當自由。就在佢看到鷓神發琢呆个時節，忽然間聽著阿哥大嫲牯聲喊：「噯！看著三角點哩啲！」佢煞煞三步做兩步走等上。等蹶到山嶺頂，心肝肚个感動，害佢目汁險淖出來。

到該下佢正知，蹶大山恁錫人个原因！

¹ 爭七毋爭八：音 zang' qid` m' zang' bad`；差不多。

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包玻璃菜个，毋過當好運，偃在學校食過一種特別个水煎包。

下晝三點過後日頭轉影¹，天時較涼哩，下課同學會湊等去打籃球，成下仔會看著，一個背痾痾个外省老阿伯企在側角。佢拗等一隻籃仔，當像驚人知樣仔，把守一隻無法度講个秘密，佢出現个時節總係看東看西，等偃兜行前去，正細心細意掀開蒙在籃仔頂背个布仔，係一籃正起鑊無幾久還燒爌爌仔个水煎包。

偃兜當當在該轉骨²，做儘像飯豚仔³樣仔，到下晝早就枵到肚屎憑背囊哩，逐儕歡喜塵天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換偃請你，好無？」兩下半，本成疊到錐錐个水煎包就分人拿忒兩三層。

水煎包下背墊張紙，偃兜連洗手都懶，五支手指頭托等，開

嘴就齧⁴落去，當像毋會爌人樣仔，緊呵緊講：「好食！好食！」水煎包有較赤⁵，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，豬肉做个料仔，摻等雞卵、蔥仔、香油、鹽這兜配料，係講若个嘴罈精，你還食得出有搯到綿綿个薑嫲，毋敢食辣个同學，乜試著好食。

偃兜緊食緊摻隔壁球場个人攞手，摻食到伸半隻个水煎包拿到高高，喊佢兜愛買就愛趕緊，機會難得，過忒這滿，下二滿毋知愛等到哪時。結果，佢兜做儘分好食个水煎包錫錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嗶嗶仔聲就像風馳雨⁶，摻這場正開始鬧熱个生理打到浪浪散，高中部个教官仔行過來哩，佢本成就面逼逼，這下還較像牛頭馬面，大自家走到尾瀉屎，外省老阿伯乜摻籃仔攞起來，恬恬行往出，對哪搭仔出現，就對哪搭仔毋見忒去。

單淨水煎包个味緒還留在偃兜个嘴角。

¹ 日頭轉影：音 ngid` teu` zon` iang`；日影偏斜。

² 轉骨：音 zon` gud`；指兒童體格發育為成人體格的過渡階段。

³ 飯豚仔：音 fan tun` e`；指將到青春期末紀食量特別大的人。

⁴ 齧：音 sen；咬。

⁵ 赤：音 cag`；黃褐色，喻煎得表皮焦黃。

⁶ 風馳雨：音 fung` cii` i`；西北雨。

112 年全國語文競賽客家語朗讀文章高中學生組（四縣腔）

編號 6 號

【整老屋】李得福原作

前一站仔，不時會看著阿公坐在廊仔下看通書¹，手頂拿筆緊寫緊記，嘴頂還會緊唸：這日仔當好，但係拆舍毋合。阿公講：「老屋个屋頂琉璃瓦舊哩，底層攤个防水塑膠布爛忒咁，故所逐間屋都漏杈杈仔，該種防水布，細老鼠會鑽入去做竇，盡遽壞，十過年就愛換一擺當麻煩，翻瓦重蓋个工錢當傷重²。佢想換過鐵桁仔奔亞鉛皮，佢做主事人，一定愛選著同佢無犯、無煞个好日腳正做得動工。」阿公擇日个學問，佢兜無學過乜聽毋識。

老屋在檳榔園裡背，用紅磚仔結連棟，密麻濟借³个樹桁頂，奔紅黃色个琉璃瓦，遠遠看去嶄然靚。係阿公後生時做个四合院，總共有十五間，但係歇無幾久，全家人徙去街頂做生理，老屋門門到今有四十零年，逐日淨伸阿公、阿婆會騎奧多拜轉去老屋拜喏。前年阿公發覺天棚頂个樹桁仔，分白蟻仔蛀淨淨，每一間屋都斷幾下支，舊年想愛整，毋過年方⁴毋到整毋得，拖到今年

大利東西个年方正做得整。

年頭專節轉老屋敬阿公婆前幾日仔，阿公會請清潔公司去拚掃一遍，方便子孫拜諾，順續仔辦三張桌席，大家共下食飯、聯絡感情。毋過舊年開始，驚琉璃瓦會跌下來傷著人，兩片橫屋都有牽索仔，禁止人員入去，好在祖先有保佑，廳下个桁桷還好，子孫正做得拜阿公婆。

禮拜日轉去菁園搵手摘菁仔，看著拆屋師傅拿等電鋸仔，坐在壁扇頂高同桁仔鋸斷，瓦同桁桷做一下跌下來，砰砰滾當得人驚。細山貓个推土機同廢料集中在禾埕，拖拉牯⁵停在路脣準備載去擲；阿公行上行下、比手畫腳在該指揮，就像拍電影个導演在該拍一齣戲。阿婆買當多客家粿粿仔、紅粿、芋粿、粽仔，分做事个師傅準點心，又泡一大茶罐个麥仔茶分佢兜啲。

下一到轉去菁園剪菁仔時，看著老屋既經變另外一座身影，深紅色个瓦型鐵皮屋頂奔好哩，日頭照在深紅色个鐵皮頂霞光燦爛，幾下个泥水師傅在該修補壞忒个壁扇同地泥，水電師傅共下在該整電火、巡水管仔。青色个檳榔園肚一座紅堡壘，係子子孫孫心靈个寄託，老屋修整前、修整後个影像永久都會留在吾心肝肚。

¹ 通書：音 tung' su'；術數家對黃曆傳注，增添擇日宜忌、神煞等內容的曆書，猶如今日常見的「農民曆」。

² 傷重：音 song' dong；很嚴重。此指整修經費很多。

³ 密麻濟借：音 mi' ma' ji jia；密密麻麻的。

⁴ 年方：音 ngien' fong'；每年的吉利方位。

⁵ 拖拉牯：音 to' la gu'；語源於日語「トラック」，卡車。

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔、報紙放在矮桌仔頂，棚等目鏡在該看國家大事；阿姆坐在竹椅、腳架在細矮圓凳，目聚聚仔看等家庭副刊。日花仔對窗仔斜斜晟入屋肚恬靜恬靜，眠在桌頂頂个烏貓仔兩隻腳還揸等報紙在該睡目，分吾个打門聲嚇一下，擘開目珠懶懶个看過來，又眠轉去繼續睡厥目。

老屋下有三隻貓仔，全都係路脣拈來个。該當時還係細貓子，正開目¹無幾日，分人用紙箱仔裝等囤在路脣草墩頂。阿爸散步經過，聽著細細聲个喵！喵！喵，正發現這兜衰過个細貓子。阿爸同細貓子帶轉屋下，倒一息仔牛乳在盤仔，細貓子鼻著牛乳味，搖搖擺擺行到盤仔脣，用厥幼幼仔个舌嫵緊舐，牛乳還膏到厥鬚鬚頂變白鬚仔，當得人惜。三隻貓子个毛色無共樣，一隻像乳牛一跡烏一跡白，尤其四隻腳个腳趾頭前白白，當像著白襪樣仔，就同佢安名「細白襪」；另外一隻全身係烏金烏金个長毛，就喊佢「長毛仔」；還有一隻生著柑仔色，又有一浪一浪个花

紋，就安到「細柑仔」。毋過阿姆無恁大神氣記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變到活跳个大貓仔，不時會自家打開窗門走出去野上野下，等到野瘰咁又對窗門鑽入來。貓仔本成就係貓科動物，同獅仔共樣有打獵个本等，雖然經過咁一萬年个馴化，毋過厥本能還無完全消失。故所，佢兜暗晡頭時常會走出去捉老鼠仔、透地龍、壁蛇轉來放在門頭前；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣過个禾鷄仔、斑鳩仔、月鴿仔畀打下來。

這駁仔轉去老屋下，總會看著三隻貓仔目絲絲仔在該啄目睡，阿姆講：「這兜貓仔老咁嘍，毋多好出去寮咁，每日眠在屋肚睡目。」係照貓仔个年紀來算，佢兜也係高齡貓咁，逐朝晨兩個看報紙个老人家同三隻啄目睡个老貓仔就係老屋下个風景。

¹ 開目：音 koi' mug`；動物初次張開眼睛。

【一雙筷子】黃秋枝原作

「好撿碗筷哩啲！」

佢係用筷子个民族，從細就愛學會擎筷子，愛學會擎筷子之前爺哀挾食分佢，言盡會使筷子食飯以前，筷子擎等搵上搵下，因爭無熟絡划飯挾菜个技巧，嘎挾到落落落；等到會使筷子該下，又好擲擲仔這挾該挾，挾到歸碗自家一等好食个菜。

屋下世大人長間教講：「筷子毋好恁精！好食个東西愛曉得勻等來大家食。」阿姆乜教講，筷子係有生目珠个，佢人想食哪樣就看準準挾啊起，毋好操去操轉掄起掄落，愛注重衛生同禮貌正好。還有，食飯時節，筷子愛擎正來，愛遵守擎筷子个規矩，做毋得用筷子敲碗、敲桌仔像乞食仔討食樣仔；手指公摺指人指愛夾核筷子个上截，另外三隻手指自然彎彎對齊，夾好筷子个兩頭，指人指毋好搵起來像指等人罵樣仔；毋好咬筷子；筷子乜做毋得插在飯碗个中央，還有，食飯拿等筷子準賭搞又乜做毋得。

係無，世大人就會大聲哆：「無人教招係無？」過較嚴條个，無就筷頭嫵掃啊去，該餐飯乜有可能分世大人喝下桌。

盡記得，還細時吾屋下个筷子，係竹仔做个，阿姆長透吩

咐，好天个時節筷子愛拿到日頭下晒，係無斯會生菇上烏點，愛落嘴个東西儘採毋得，愛知「病對嘴入，禍對口出」个道理。故所，還細時，晒筷子乜係吾个頭路，一支一支仔頭對頭、尾對尾，擺開來拿到天下晒日頭。

頭擺人，勾挽人客在屋下過餐乜會講：「糯米打糝罕得幾多時！便菜飯仔乜就加一雙『筷子』定定。」只愛人情好，食水乜甜，一雙「筷子」增添了人摻人之間个交流同感情。還記得，有一擺愛敬床公婆搵擺菜盤，佢就照佢人食飯个規矩準備一雙筷子，阿姆遽遽喊講同筷子拿轉去，相傳，敬床公婆毋使擎筷子，係擎筷子敬床公婆，床公婆會拿筷子教示細人仔這種生趣个講法。

人講，筷子一頭圓一頭方就像天圓地方；手擎筷子五隻手指愛上中下配合使用，代表天地人三才；筷子一分為二，又合二為一，代表陰陽結合，包容、平衡¹、和諧。

¹ 平衡：音 pin^ˇ fen^ˇ；平衡。對立的雙方面在數量、質量或力道上相等或相互抵消。

112 年全國語文競賽客家語朗讀文章高中學生組（四縣腔）

編號 9 號

【細日頭】胡明華原作

細日頭係阿生畜个鸚哥¹，兩片面頰卵有紅叨叨个圓箍仔，看起來就像係細細个日頭，故所安佢「細日頭」。佢圓身白白，尾長長，頭那頂有一抓長長黃黃梳到腦屎背个頭那毛，身形盡靚。

細日頭還係細鳥子个時節就分阿生對店項帶轉屋下，對佢歸身無毛軟頭扁摺到厥翼胛毛生到亮亮齊齊，同佢最親个人就係阿生，見看著阿生，佢就歡喜靈天²，暢到奈毋得，啾啾滾緊唱歌。佢長透企在阿生个拈食指³無就肩頭項，不時就佷兼去，用背輕輕仔啄阿生个面、西出一細截舌嫵咬阿生，有時還會咬到厥耳砵，迂來迂去，實在生趣。有一擺，阿生對等自家翕一張細日頭咬厥面个相片，細日頭看啊著，煞煞又過再咬加一到，害屋下人笑到貶轉來。

細日頭个毛正生齊个時節，識飛走一擺。該日阿生毋知哪條腸仔毋直⁴，攞等鳥籠去公園，學人放鳥仔，望想嘍細日頭飛出去

¹ 鸚哥：音 en' go'；鸚鵡。鸚形目，在動物分類學上是鳥綱中的一個目。

² 歡喜靈天：音 fon' hi' lag' tien'；欣喜異常。

³ 拈食指：音 ngiam' siid zii'；食指。

⁴ 毋知哪條腸仔毋直：音 m' di' nai tiau' cong' e' m' ciid；不知哪條腸子打結，喻心情不好。

再過飛轉來，望想展風神。無想著鳥籠仔正打啊開來，就看等細日頭翼披披仔，兩下半就飛到十二樓恁高，跔等就無影無跡也。阿生心焦到無結無煞，滿哪尋去尋轉都尋無！佢歸暗晡睡毋落覺，天旨光就緊拚拚仔再去公園尋。佢有聲喊到無聲，嘴又燥肚又渴。好得皇天不負苦心人，包尾分環保人員在一頭樹頂尋著，一人一鳥正過再相逢。

前一駁仔，阿生試著細日頭大咧，就無注意照顧，淨顧自家个事，陪佢个時間緊來緊少。麼人知細日頭嘎開始背自家个毛，到有一日，兩片翼胛下總下分佢自家擲到淨淨，就像人發病頭那敷毛敷到光頂共樣共樣，這時阿生正緊張起來，遽遽送去鳥仔醫院。衰過正得啊！藥錢比人看病還較貴！

人講「慧慧慧，豬肉煮米醬；精精精，無屋好居身。」阿生原旦還話著自家一等精，省忒陪細日頭个時間就賺著時間來趕事，毋會仰般，結果害著細日頭，也害著自家，正經係假精無錢賺。

這擺阿生學乖哩，開始認真照顧細日頭，還分佢戴伊麗莎白頸圈⁵，莫分佢過再背自家翼胛下个毛；也知得原來做鸚哥个主人愛盡用心，同佢照顧好勢。佢到底係快樂抑係悲傷？係發譴抑係緊張？係肚枵抑係嘴渴？甚至，佢係毋係會愠悴？都愛耐心同佢做伴，恁樣正會人鳥兩相安哪。

⁵ 伊麗莎白頸圈：音 i' li' sa' pag giang' kien'；伊麗莎白頸圈。一種由動物穿戴的保護性醫療器械，形狀為截錐形，用於防止動物啃咬或舔舐正在癒合的患部。

【長薯仔】徐秀英原作

前一駁仔鼻公頭哼出一粒長薯仔，又紅又腫，當徑眼¹又動佢毋得，一恁著愛帶等佢出出入入，心情都煩躁起來吔！學生仔儕讀書壓力大，長透目無好睡足，有人講係火氣大引起个，有人講係面無洗淨正會恁樣，毋過，同學都知，這係後生人个專利，記錄佢兜个青春。長薯仔，又安到青春痘。

長薯仔係得人畏个違章建築，就像係該平平个路面翹起來个人孔蓋，像係該光滑个球面撇毋下去个嘜風嘴。係歸面仔生到密密又貢膿，這時節定著愛注意感染个風險，係無正經就會分佢搵到無結無煞，就驚一無注意生來白幼个面，嘎變做礫礫砣砣个「月球表面」，到時節自家就愛刻耐仔「歇月球」咧。

為著愛打敗長薯仔這外星人个攻擊，佢決定進行作戰計劃，經驗豐富个阿姆，順利登上指揮官个大位。因為鼻公頭該粒最大粒最痛，旨熟又掙毋得，阿姆就拿出厥秘密武器——綠豆粉同蜂糖。佢同這兩項攪共下，膏在佢个鼻公頭，佢問阿姆講，鼻公會分蟻公扛走無？阿姆緊噓緊視佢應講：「佢頭擺就係恁仔膏好

个，比起你這下个樣相，仰仔就毋會較慘啦！」。

阿姆又講，做毋得食忒躁个東西，火氣大長薯仔正會緊噓。偃同同學下課个時節，固定會去賣鹽酥雞个攤仔買雞排，炸到酥酥香香个雞排，淨恁就會害人流口涎，過再講愛趕等上暗晡頭个課，雞排就係當多學生仔當好个選擇。阿姆不時交代毋好緊食這兜有个無个，買隻麵包先砣肚，轉來正食正餐乜做得。毋過，就係當難掌這張嘴啊！為著自家一面个春光，偃心想，死馬做生馬醫，就聽阿姆个好哩！順續仔，乜來調整一下自家个飲食習慣。阿姆个秘密武器毋單淨有綠豆粉同蜂糖，還有笏瓜仔、蘆薈、黃連、菊花茶這兜，膏个食个樣樣齊。

逐暗晡洗好身到睡目个一細段時間，偃會搞手機仔放鬆心情，這時節，有責任心个指揮官——阿姆，定著會來推門。門外該片阿姆大聲放送：「無睡飽，長薯仔斯毋會好哦！」雖然抗痘个過程有息把仔難耐²，好得，這下吾面斯緊來緊亮³哩啲！

¹ 徑眼：音 gang ngien；礙眼。

² 難耐：音 naiˋ ngai；難以忍受。

³ 亮：音 lang；平整亮麗。